

LIGJ
Nr. 124/2014

**PËR DISA SHTESA DHE NDRYSHIME NË LIGJIN NR. 9718, DATË 19.4.2007, “PËR
URDHRIN E INFERMIERIT NË REPUBLIKËN E SHQIPËRISË”, TË NDRYSHUAR**

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 9718, datë 19.4.2007, “Për Urdhrin e Infermierit në Republikën e Shqipërisë”, të ndryshuar, bëhen këto shtesa dhe ndryshime:

Neni 1

Në nenin 6, pika 2, pas shkronjës “dh” shtohet shkronja “e” me këtë përmbajtje:
“e) garanton që anëtarët e Urdhrit përmbushin detyrimet e programit të ricertifikimit, të vendosur nga institucioni përkatës.”.

Neni 2

Neni 7 ndryshohet si më poshtë:

“Neni 7

1. Urdhri i Infermierit, gjatë kryerjes së detyrave, mban lidhje të vazhdueshme me ministrinë përgjegjëse për shëndetësinë dhe institucionet e saj të varësisë si dhe me ministrinë, institucionet qendrore dhe organizma të tjerë publikë ose jopublikë, të krijuar sipas legjislacionit në fuqi.

2. Urdhri i Infermierit informon çdo 6 muaj ministrinë përgjegjëse për shëndetësinë për anëtarësimet e infermierëve, mamive, fizioterapeutëve, teknikëve të laboratorit, teknikëve të imazherisë dhe logopedistëve, për gjykimet disiplinore dhe ecurinë e tyre në të gjitha shkallët e gjyimit profesional. Ky informacion publikohet edhe në faqen e internetit të Urdhrit.

3. Inspektorati Shtetëror Shëndetësor bashkë-punon me Urdhrin e Infermierit gjatë ushtrimit të funksionit të tij.

4. Ministria përgjegjëse për shëndetësinë bashkë-punon me Urdhrin e Infermierit për hartimin e projektligjeve dhe të dokumenteve të rëndësishme në fushën e shëndetësisë.”.

Neni 3

Në nenin 9 bëhen këto shtesa:

1. Pas shkronjës “c” shtohet shkronja “ç” me këtë përmbajtje:

“ç) presidentët e Urdhrit.”.

2. Në fund të nenit 9 shtohet pika 2 me këtë përmbajtje:

“2. Zgjedhjet në organet e përmendura në pikën 1 të këtij neni duhet të sigurojnë përfaqësim në masën 30 për qind për çdo gjini, në përputhje me ligjin nr. 9970, datë 24.7.2008, “Për barazinë gjinore në shoqëri.”.

Neni 4

Pas nenit 9 shtohet neni 9/1 me këtë përmbajtje:

“Neni 9/1

Presidentët e Urdhrit

1. Presidentët e Urdhrit zgjidhen me votim të fshehtë nga Këshilli Kombëtar dhe këshillat rajonalë të Urdhrit ndërmjet jo më pak se 2 kandidaturash alternative.

2. Këshilli Kombëtar zgjedh Presidentin e Urdhrit të Infermierit, me mandat 5-vjeçar, me të drejtë rizgjedhjeje vetëm një herë, me shumicën e votave të të gjithë anëtarëve të tij.

3. Këshillat rajonalë zgjedhin presidentët e këshillave rajonalë. Mandati i tyre është 5 vjet, me të drejtë rizgjedhjeje vetëm një herë.

4. Kandidaturat për presidentë të Urdhrit të Infermierit duhet të përmbushin këto kritere:

- a) të jenë jo më shumë se në moshën e daljes në pension në momentin e zgjedhjes;
- b) të kenë jo më pak se 15 vjet përvojë në profesion;
- c) të kenë përvojë dhe të dhëna të besueshme për aftësi komunikimi, organizuese e drejtuese;
- ç) të mos kenë marrë masa ndëshkimore disiplinore në 5 vitet e fundit;
- d) të mos jenë të dënuar me vendim të formës së prerë për kryerjen e një krimi apo për kryerjen e një kundërvajtjeje penale.

5. Funksioni i presidentëve të Urdhrit të Infermierit është i papajtueshëm me funksione të tjera administrative, shtetërore apo politike.”.

Neni 5

Në nenin 10, pika 1, emërtimi “Asambleja e Përgjithshme” zëvendësohet me emërtimin “Asambleja Kombëtare”.

Neni 6

Neni 11 ndryshohet si më poshtë:

“Neni 11

Këshilli rajonal

1. Këshilli rajonal krijohet në bazë qarku dhe përbëhet nga 5 deri 9 anëtarë në varësi të numrit të anëtarëve të Urdhrit të Infermierit, në qark.

2. Këshilli rajonal zgjedh presidentin dhe zëvendësit e tij.

3. Këshilli rajonal emëron dhe shkarkon sekretarin e tij.”.

Neni 7

Në nenin 12, pika 1 ndryshohet si më poshtë:

poshtë: “1. Këshilli Kombëtar i Urdhrit të Infermierit përbëhet nga jo më shumë se 25 anëtarë, si më

a) Presidenti i Urdhrit të Infermierit;

b) zëvendëspresidenti;

c) presidentët e këshillave rajonalë;

ç) një përfaqësues i ministrisë përgjegjëse për shëndetësinë;

d) një përfaqësues i shkollave të larta të infermierisë;

dh) një përfaqësues i Fondit të Sigurimeve të Detyrueshme të Kujdesit Shëndetësor;

e) dy përfaqësues të Shoqatës së Pacientëve;

ë) një përfaqësues i Sindikatës së Infermierëve;
f) pesë anëtarë të zgjedhur nga asambleja kombëtare, sipas qarqeve me numër popullsie më të madhe.”.

Neni 8

Në nenin 16, pika 2, bëhen ndryshimi dhe shtesa e mëposhtme:

1. Shkronja “c” ndryshohet si më poshtë:

“c) gjobë nga 1 500 lekë deri në 100 000 lekë.”.

2. Në fund të shkronjës “dh” shtohet paragrafi me këtë përmbajtje:

“Gjoka e vjelë, sipas shkronjës “c”, të pikës 2, të nenit 16, derdhet në Buxhetin e Shtetit.”.

Neni 9

Ky ligj hyn në fuqi 15 ditë pas botimit në Fletoren Zyrtare.

Miratuar në datën 25.9.2014

Shpallur me dekretin nr. 8740, datë 14.10.2014 të Presidentit të Republikës së Shqipërisë, Bujar Nishani